

02 阿公變魔術

周世雄

佇我細漢猶未讀小學的時，有一段時間搬轉去恰阿公蹕做伙。阿公逐工透早著愛飼豬，所以我耳空邊若聽著一陣一陣豬仔鼾鼾叫的聲，彼就是準時叫我起床的亂鐘仔聲。

猶會記得佇阿公的豬牢邊，有一片園仔，花草恰果子種甲滿滿是。彼時感覺阿公若親像魔術師仝款，毋管啥物樹樣佇伊的手內，攏會開真嬌的花蕊、生誠芳甜的果子。我見擺若綴阿公入去巡園仔的時，足愛刁故意目睭瞞瞞，那行那用鼻空去聽我這馬待佇佗一樣樹仔跤，因為滿園的芳味早就深深印佇我的頭殼內。若是挂著假日，規片園仔就變做阮這陣乖孫天然的遊樂園兼果子店。要到佗位，挽到佗位，挽甲雙手捧袂離，閤食甲喙瀾涌瀾滴。

我印象上深的一擺，就是看阿公共米甕掀開，沓沓仔對內底掣一粒釋迦出來欲予我食。彼時我看甲目睭攏無睇，想講阿公底當時遐勢變魔術？當當我行倚去看的時，才發覺甕仔內有幾若粒釋迦予白米坎牢咧，而且規个甕仔攏充滿釋迦的芳味。阿公共我講：「猶未 sik 的釋迦著愛隱佇米甕內，按呢才袂啞口啦！」我聽了隨應講：「釋迦生本就袂曉講話，啞口是正常的啦！」後來阿公才笑哈哈共我解說：

「啞口佇遮的意思是咧講果子隱無 sik，袂食得啦！」

若到暗時，阿公見擺咻酒咻甲馬西馬西的時，伊就足愛變魔術予阮這陣乖孫的看。尤其阮上愛看的魔術是阿公會共手面倚佇耳空邊，目睭放瞞瞞，喙裡唸阮毋捌聽過的咒語。最後共阮這陣目睭展甲大大蕊的乖孫講，挂才伊有請聖誕老阿伯捐一寡仔銀角仔來送予伊的乖孫。錢伊已經偷偷仔圓佇窗仔溝，叫阮緊去掣。阮聽了，就欲信若毋信從去窗仔邊，結果真正有一疊銀角仔圓佇遐，逐家分甲笑微微。

大漢了後，雖然知影阿公變的攏毋是真正的魔術，毋過伊雙手所變出來滿園的芳甜恰規厝間的笑聲，是我心目中上有意義的魔術。